



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 8

Yangia anidakangma :



Tir Yimym



tir_yimym



tir yimym

TAPAK 3

Iyer-i ICC Men's Player of the Month naroküm nguogo

Waqf Act ya taoba mapang aibelen metongshitsü atema lir: Rijju

VOL. XXII ISSUE NO. 182 (ADOK 182) DIMAPUR RASEMNÜ WEDNESDAY RONGCHII (APRIL) 16, 2025 ₹ 5.00

ACAUT Nagaland-i HE department anema okadaki aotsü

Dimapur, April 15, 2025 (TYO): State sorkari December 12, 2024 nü Assistant Professors aser Librarians 147 tashi regularize asüba magizüker aser iba lemtet meyipa magira okadaki aotsü ta ACAUT Nagaland-i metetdaksüogo.

Higher Education department ya tarutsü pututem atema loktiliba yanglushiba aser renlokdahtsüba department ka lir anungi mapang ajak nung timi aser ochishia inyaksüla ta ACAUT Nagaland-i ashi.


September 11, 2024 nü fix pay nung inyakba Assistant professors 151 tashi mapa nung anioktsü Cabinet lemtet ka kanga

dang meshisadangi agiba ka lir. State sorkari iba lemtet agiba ya temsüa aliba kaketshirtem asoshi lendong tulu lir ta Media Cell, ACAUT sangdong ka nung ashi.

ACAUT-isa Higher Education Minister melentsü aser tetemjen nisung ka nem department ketdangsüa reprangdahtsütsü takhangba agütsüogo.

Assistant Professors aser Librarians 147 tashi contract nung inyaka lia regularize asüba meyipa agütsüla aser sanctioned post ajak NPSC aser NSSB ket nung agütsütsüla, yamaji meinyakra onoki okadaki aotsü ta ACAUT-isa metetdaksü.

Naga kaketshir tanishirtemi Mary Mead nem tetushi agütsür



Clark Compound, Molungyimsen nung Pastor Rev. S. Tajung-i NSF Tir Medovi Rhi nem yimjung wako agütsüba angur.

Federal Assembly nung NSF kübok federating units, subordinate bodies aser special invitees nungi nübo 130 shi Molungyimsen nung adenshia liasü.

Iba federal assembly nung adeni arurtem pelaa agizükba sentong ka April 11, 2025 nikongdang Molungyimsen Local Planning Committee-i achaayanga agi.

Sentong mezüngbuba shilemji Clark Compound nung agi aser idakji Rev. Maken Sanglir-i NSF tanishirtem meshiteta sarasademtsü. Iba sülen Molungyimsen Baptist Arogo Pastor Rev. S. Tajung-i NSF President Sp. Medovi Rhi nem yimjung wako ka agütsür "Peace March to Naga Unity" tenzük.

Luyong Village Council-i anir Molungyimsen Lanu aser Reongsanger Putu Menden den külemi NSF delegates-i Meyochi meyua Yimkong Salang tashi "Peace March" jaja aser idakji Civic Reception Program ka agia tembang.

Iba sentong nung Planning Committee Convenor Wb. Lipokmar Tzüdir-i tarurtem pelaa agizük aser AKM Tir Sp. Lanutoshi Aier o NSF Tir Sp. Medovi Rhi nati salem osang aben.

Sentong nungsa Molungyimsen Reongsanger Putu Menden Chairman Wb. Lanuyanger Nokdir-i nülak songa jembia aser MBA Pastor Rev. S. Tajung-i tenüngsang agüja sarasadem.

Nagaland nung shisaluyimba aser kaketkeno Molungyimsen nungi tenzükba ajiteta 2003 nung AKM-i Molungyimsen dang 2003 nung "Cradle of Education" jalokja liasü aser ibaji NSF-ia pusema nungit. Iba sülen Nagaland sorkari Cabinet lemtet ka ajanga 2011 nung Molungyimsen dang "Naga Educational Heritage Village" naroküm agütsü.

Naga lima nung 'formal education' tenzük 2028 nung küm 150 benjungmung amungtsü aliba dak rangloker Molungyimsen nung iba federal assembly amunger ta NSF tanishirtemi ashi.

2023-25 kümük atema 5 buba

CM Rio-i ENSF Cultural Fiesta Cum General Conference nung aden



Tuensang nung 8 buba ENSF Cultural Fiesta Cum General Conference nung Chief Minister, Dr. Neiphiu Rio nem tetushi agütsüba noksa nung angur.

Dimapur, April 15, 2025 (TYO): Chief Minister Dr. Neiphiu Rio-i April 15, 2025 nü 8 buba Eastern Naga Student Federation (ENSF) Cultural Fiesta Cum General Conference nung aden.

Iba sentong ya Parade Ground, Tuensang nung 'Deliverance through Ethnicity Concord' omen nung ajemdaker amunger.

"India sorkari nisung ajak atema Right to Education sangdongogo aser Nagaland nunga quality education agütsütsü atema mapa inyaker" ta CM Dr. Rio-i ashi.

"Nagaland kübok Eastern tsütsü dang Backward ta ajar kechiyong Eastern tesemtem ya British yimsüsüba kübok maden liasü. 1957 nung ang Tuensang nung Naga Hills Tuensang Area ta ser headquarter amenok saka Nagaland kübok tangalen

Khristan yimsü aru aser iba sülen shisaluyimba tenzükba liasü. Iba jagi Eastern Naga tesemtem nung shisaluyimba kanga menu rang tenzük" ta pai ashi.

"Nagaland kübok Eastern tsütsü Education, Health Care, Roads, communication aser infrastructure development nung teinyaktsü jenti lir aser ozü sorkari Eastern Nagaland ajungkettsü atema akokba tashi mapa inyaktsü" ta CM Rio-isa ashi.

Hoho tem, lisopur lennirtem aser linük tenzükertemi Yimjung Olemtep tembangtsü atema longjemtsüla aser tesentaktep akangshitsüla ta paisa shisem.

"Centre sorkari artsülen Free Movement alenbangba ozü sorkaria magizüker" ta CM Rio-isa ashi.

"Kaketshir teloktem, Administration aser Police-i ozüng alema arurtem nem Inner

Line Permit aser Indigenous Certificate agütsüba nung kanga kümdangtsüla. Naga nunger kanga tia taka kechiyong British nungeri Naga nunger sobaliba aser ozüngtem kümzüka ayutsü atema iba Act yanglua toktsü. Kaketshirtemi asen putiotsü, sobaliba aser inyaksangshi kümzüka ayutsüla" ta paisa metetdaksü.

Iba sentong nung Executive Secretary, USBLA Rev. Imtiba Sangtam-i temoatsü meshia sarasadem, President ENSF Chingmak Chang-i tesentepertem pelaa agizük; Housing and Mechanical Minister for P. Bashangmongba Chang aser President NSF Medovi Rhi-i o tatsütsü jembia.

Iba sentong nung Power & Parliamentary Affairs Minister K.G. Kenye, Tribal Affairs and Election Advisor H. Tovihoto Ayemi, Minority Affairs and Sericulture Advisor Imkongmar, Fire & Emergency Services, Home Guards and Relief and Rehabilitation Department Advisor S. Kiusumew Yimchunger, IT, Communication, Economic and Statistics and Evaluation Advisor Sethrongkyu, MLA Lima Onen Chang, MLA Imtichoba Chang aser MLA Benei M Lamthiu nungeri CM Dr. Rio meina aru.

Advisor to Chief Minister aser Chairman IDAN Abu Metha-i nikongdang Folk Fusion Night nung tetushi süa jaoker ka ama shilem agi.

La Ganesan-i Viksit Bharat nung lanurtemi shilem agütsü ayongzük

Dimapur, April 15, 2025 (TYO): Nagaland Governor aser Nagaland University Chief Rector La Ganesan-i 7 buba Convocation Ceremony nung shilem agidang Viksit Bharat/Developed India nükjidong atongtsü atema lanurtemi shilem agütsü ayongzük.

April 15, 2025 nü I. Ihoshe Kinimi hall, Nagaland University, Lumami, Zunheboto nung iba sentong agia liasü.

"2047 tashi nung Viksit Bharat/Developed India atema nükjidong atongtsü atema India nung lanuputu ya kanga tongtipang lir" ta Governor Ganesan-i ashi.

"Graduate asüba kaketshirtem nem tenüngsang agütsür aser kaketshir shiaia Nagaland aser linük asoshi konang bentsür arutsü merangtsüla" ta La Ganesan-isa ashi.

Kaketshir shiai graduate asüba sülen wadang tuluba inyaka aotsüla. Nenok Nagaland University atema brand ambassador kümogo aser iba linük len anirtem lir ta paisa ashi.

Nagaland Governor-isa tesayurtem dang kaketshir shia nem skills aser shisatsü agütsütsü ayongzük.

Iba convocation nung kaketshir 115 graduate asü aser parnok rongnung Gold medallist

38 aser PhD awardee 30 tashi dena lir.

Tanü convocation sentong nung National Anthem aser University Song aten aser Registrar NU, Dr Abemo-i declaration of convocation shilem agi.

Nagaland University Vice Chancellor Prof. Jagdish Kumar Patnaik-i tesentepertem pelaa agizük aser university ajanga takok balala bener aruba osang lemsatet.

Sentong nung Nagaland University Chancellor Dr. Samudra Gupta Kashyap-i Conferment of Degree shilem agi aser Prof. B. Kilangla Jamir-i anküp tepela o jembia.

NSF-i IAS ketdangsür Wilfred mapa nungi anentsütsü akhanger

Dimapur, April 15, 2025 (TYO): Investment and Development Authority of Nagaland (IDAN)

nung Joint Secretary Reny Wilfred, IAS-i tetsürtem dak tim mesüi kongshiba ken o tem benoka liaka pa maneni sorkar mapa inyakdahtsüba atema tebilemtsü abener ta Naga

Students' Federation (NSF)-i metetdaksüogo.

Wilfred anema ken o tem benokaka pa maneni mapa inyakdahtsüba nung lendong keta lir. Iba ajanga sorkar mapa inyakertem aser talisa tetsürtem jenjang mejungi kümdaktsür aser public-i sorkar dak temulung

alemba samar, ta NSF-i ashi.

Pa anema ken o benoka aliba atema bushisüngdanga yimjak nung mesangdong tashi Wilfred mapa nungi anenja atatsüla. Bushisüngdangba maparen nung nisung kari dang meinprongra NSF aser Naga nungeri magizütsü ta parnokisa ashi.

Mokokchung DPDB senden menogo



Speaker NLA & Chairman DPDB, Mokokchung, Sharingain Longkumer ajanga April 15, 2025 nü Mokokchung District Planning & Development Board senden nung jembidang tangokba noksa nung angur.

Dimapur, Rongchii/April 15 (TYO): Ita shia amenba Mokokchung District Planning and Development Board (DPDB) senden April 15, 2025 nü Deputy Commissioner, Mokokchung indang Conference Hall nung NLA Speaker & Chairman, DPDB Mokokchung, Sharingain Longkumer lenisüba kübok menogo.

Taoba senden nung lemteta aliba lepa repringshiba mapang, district (Longkhum Village) nung tesüiba küm ana tashi Cherry Blossom Festival takok ngua amungba nung yaritepba

aser shilem agiba atema House nung züngsem ajunga dang Chairman-i pelaba lemsatapa liasü.

Akhi mapang nungi amungba benjongbentsü dak alia aser dangar chilo majizüki cherry blossom aser cucumber benjongmung amala ajungshitepa amungtsüla, ta Sharingain-i ashi.

Senden nung agenda tem benoka jembidang Deputy Commissioner, Mokokchung, Thsuvisie Phoji-i DC Bungalow, Mokokchung ya heritage building ka ama wazüka ayutsü indang rateta ashi, koba küm 145 tain lir.

Iba ki yanglushitsü jenti lir, saka aji renemba sülenbo Mokokchung district nung aliba nüburtem atema kisüng masü saka state ajunga asoshi jenjang aketba oset ka ama akumtsü ta ashi, koba sorkar dangi yoktsü senden nung pangjema liasü.

PWD (National Highways aser Road & Bridges) ajanga meyi mapang atema renemshia aliba osang agütsü aser District Soil & Conservation; Executive Engineer, PWD (NH); District Horticulture aser Fire & Emergency Services department tem ajanga Capital Assets osang agüja liasü.

NTC chairperson inyaksü V Samuel shimogo

Dimapur, Rongchii/April 15 (TYO): Niuland Town Council indang taoba chairperson temang majungba ajanga mapa yutsüba sülen April 15, 2025 nü V. Samuel Holo ya chairperson tassenba inyaksü shimogo. Züngsem 9 aliba nungi züngsem 7-i chairperson tassenba bhukuma liasü.

Mokokchung DC ajanga metetdaksür

Dimapur, Rongchii/April 15 (TYO): Mokokchung District nung Additional Deputy Commissioner, Mangkolemba indang Administrative Jurisdiction kübok Satishiba yimtsüng recognition atema asüngdanga lir, ta Deputy Commissioner, Mokokchung, Thsuvisie Phoji, NCS ajanga sangdong ka nung metetdaksü.

Iba yimtsüng recognition dak sendakba nung tai aputsü/ ashishiteptsü lira iba sangdong adoker anogo 30 tsüngta, iba Office nem agütsüla, aji mesüra 'No Objection' ama züngshitsü aser nüngdak mera agitsü atema sorkar dangi yoktsü. Ali tasazük 1001.01 Acres (mesüra) 4,35,64,356 Sq fts aser arütsü North nung Lakhuni, South nung Japu, East nung Longjemdang aser West nung dak Longpayimsen/Watiyim alitsü.

DoSE ajanga metetdaksür

Dimapur, Rongchii/April 15 (TYO): Department of School Education ajanga Sub Divisional Education Officer, Tseminyu, Department of School Education, Nagaland kübok MTS post ana atema taoba mapang advertisement agütsüba nung ajemdaker March 28, 2025 nü recruitment agiba nung marks anguba nung ajemdaker aser sorkari April 8, 2025 nü agizükba ama Khebi Tsela aser Gwachulo Kent shimba metetdaksür, ta sangdong ka nung metetdaksüogo.

Chümoukedimanung Healthy Baby Showayongzük



Dimapur, Rongchii/April 15 (TYO): Linük tesem ajunga nung Poshan Pakhwada benjongmung nung shilem ka ama Office of the District Programme Officer Dimapur ajanga General Administration aser Mission Shakti den lungjemer Anganwadi Training centre, Diphuphar, Chümoukedima nung April 15, 2025 nü Healthy Baby Show ayongzuka liasü.

Iba sentong ya district level program ka liasü, koba tsürabor nem health aser nutrition awareness agütsütsü, tila tanur asüdag achi-ajemtsü shidak agütsütsü, teti health check-up

agitsü aser mürekmeju alitsü indang angatetdaksütsü nükjiding nung ayongzük.

Iba mapang kinü tanurtem temang asadanga liasü. Iba mapang project asem - Office of the Child Development Project Officer Dimapur, Office of the Child Development Project Office Dhansiripar aser Office of the Child Development Project Officer Medziphema nungi tanur tetsü tem tejangraba nung shilem agia liasü.

Iba tetoktepba nung takok angur ya 'overall health indicators' nung ajemdaker shima senpet sen agüja liasü.

FAC nung Career Guidance & Counselling sentong ayongzük

Dimapur, Rongchii/April 15 (TYO): Fazl Ali College Career guidance and Counselling Cell ajanga Imperial IAS Academy den lungjemer UPSC aser NPSC Guidance program ka April 15, 2025 nü final year BA/BSc azünger atema ayongzuka liasü.

Iba sentong nung Nungshitemjen menden liasü aser shisalen sayur Achumi Yanthan, Centre Manager Imperial Academy liasü.

Sentong nung Anato Sema-i iba Academy indang tongmelang agi rateta ashi aser competitive examinations agütsütsü jangrar aser pei tarutsü career asoshi



Ms. Achumi Yanthan

mangmanga aliba kaketshirtem telok ana lemdang aser telok

anaprong nem takotet nisungtemi counselling agüja lenmang sayua liasü aser iba sülen Q & A session agi.

Iba sentong ya kaketshir aser tayongzük asoshi tajangzük akaba sentong ka liasü.

Imperial Academy ajanga iba sentong nung adenba kaketshir ajunga nem Scholarship Certificate sen 25,000 indang agüja liasü, koba ajanga iba coaching institute nung azünger dang sen 25,000 ajemtsü.

Maneni iba Academy ajanga College Library atema UPSC aser NPSC kaketshir tem tenla agüja liasü.

DC Kohima-i arem arongba nokdanger

Dimapur, Rongchii/April 15 (TYO): District nung tesem balala nung morok mi lendong tali atalokba mechi Deputy Commissioner, Kohima, B Henok Buchem-i totuyuba ka agütsüba nung, asaa mesüra zübazüyima arem arongba nungi iba ama morok mi adoka arem shiruru

aliba tesem aser ki o jen raksaa nisung takum asoshia lendong bener arutsüba ajiteter, ta ashi.

Anungji BNSS indang Section 162 kübok iba ama inyakyim yagi nüburtem nem timtem agütsür aser nisung takum aser ki o jen lendongi yoket ta ajiteta arem arongba

ajunga nokdanger, ta ashi.

Nisung kija/telok kari iba totuyuba nung aibelenba putetra BNSS, Nagaland Forest Act, 1968 aser Rules of Administration of Justice and Police in Nagaland, 1937 kübok tapet ozüing agi merenshitsü, ta metetdaksü.

NAGALAND POLLUTION CONTROL BOARD						
Signal Point, Dimapur - 797112, Nagaland Tel.: 03862-245727, TeleFax: 03862-245726 Website: www.npcb.nagaland.gov.in e-mail: npcb2@yahoo.com						
AMBIENT AIR QUALITY FOR KOHIMA AND DIMAPUR CITY						
KOHIMA ASER DIMAPUR NUNG MOPUNG MERÜK-MEMERÜKBA JENJANG						
Sl. no	City	Location of air station	Type of area	Monitoring dates		Permissible limit As per the National Ambient Air Quality Standards "Iba tasazük alemabo metudaksütsüla"
				08.04.2025	10.04.2025	
1	Dimapur	Bank Colony	Residential	165	153	100 µg/m ³
2		Dhobinala	Commercial	211	192	
3		NPCB Office, Signal Colony	Residential	163	142	
4		Tenyiphe, Chumoukedima	Commercial	115	121	
5		Nagarjan	Residential	133	140	
6		Viola colony	Residential	132	114	
7		Burma camp	Commercial	196	210	
8	Kohima	Opposite NST Office	Residential	88	63	
9		PWD Junction	Commercial	106	87	
10		High School Junction	Commercial	187	164	
11		Midland (Upper)	Residential	107	98	

Iba osang ya nübortem ajangzüksü atema Nagaland Pollution Control Board-i agütsür.



2ND EDITION
AO MOATSÜ FOLK SONG ONLINE SOLO CONTEST

Organized by Ashipo Society Chuchuyimlang
In Collaboration with Media 24 Studio



Genre : Ao Folk song / Language : Ao / Age Criteria : No Age Bar.
Contestants should compose the song based on MOATSÜ.
Contestants can use any instruments for accompaniment.
Pre-recorded audio will not be entertained.
Contestants can WhatsApp the record video on the given numbers below.
Registration fees: Free registration starts: 15th April 2025.
Submission last Date: 26th April 2025
Winner will walk away with Cash Prize : Rs.10,000/-
FREE AUDIO RECORDING SPONSORED BY SUNEP LEMTUR (MEDIA 24 STUDIO DIMAPUR)
For any queries and submission of song Videos Whatsapp: 7005649287/8729877877
Instagram: ASHIPO _Society

India, Tanzania na defence tesendaktep atema sensak asem



Minister of State for Defence Sanjay Seth aser Minister of Defence and National Service of Tanzania Stergomena Lawrence Tax noksa nung angur.

New Delhi, Rongchii/April 15 (Agencies): Minister of State for Defence Sanjay Seth-i Tanzania indang Minister of Defence and National Service Stergomena Lawrence Tax den Dar es Salaam nung ajurutepa counter-insurgency aser counter-terrorism operations nung bilateral tesendaktep akangshitsü atema lenmang tasen bushitsü asoshi sensaksemogo.

Iba senden ya April 14 nü mena liasü. Seth-isa Tanzania Vice President Philip Isdor Mpango den ajurutepogo, ta Indian Ministry of Defence-i Mongolbarnü metetdaksü.

Seth aser Tax na senden amenba mapang, tang linük ana tsüngda defence nung tesendaktep lepa reprangshi aser tesendaktep akangshitsü atema lenmang tasentem asadanga liasü.

"Tanzania nunger officer tem military training institutes of India nung training agitsüba, defence industry tesendaktep, counter-insurgency aser counter-terrorism operations nung teka amteper inyaksüba aser cyber security amala ken o tem benoka sensaksema liasü," ta defence ministry-i metetdaksü.

April 13 nü Seth aser Tax nati INS Chennai nung Indian Navy indang mezüngbuba inyakyim Africa India Key Maritime Engagement harbour phase tenzükja liasü. Iba ya Dar es Salaam nung multilateral naval exercise ka lir. Tenatisa Defence Expo ka lapokja liasü.

Sentong nung o jembiba mapang Seth-i, tzüym nung tetsükdaksütem koktettsü aser tarutsü yimjiyimjung nung toktsütsü atema longjemtsü koda tongtibang iba indang lemsatapa liasü.

India aser Tanzania nati ayongzükba naval exercise nung Comoros, Djibouti, Kenya, Madagascar, Mauritius, Mozambique, Seychelles aser South Africa nunger ajak densema lir.

Kasa mapang nung Tanzania Vice President Mpango den sensaksema mapang Seth-i, Africa-India Key Maritime Engagement cooperation, Indian defence industries, exercise AIKEYME, aser Defence Expo indang metetdakja liasü.

Paisa, Tanzania People's Defence Force tenüngdakbatem ataloktsütsü asoshi maongka agüja liasü. India-Tanzania na terenlok maparen balala, sobaliba tesendaktep aser health o education sector nung teka amteper inyaksü atema senaksema liasü, ta kasa sangdong ajanga metetdaksü.

ED-i Robert Vadra dang ken o ashishi

New Delhi, Rongchii/April 15 (Agencies): Shishilembar Robert Vadra dang Enforcement Directorate-i Delhi nung Gurugram ali ken o dak sendakba nung ken o balala asüngdangogo.

"Ni sorkari mesüra kecha agency-ia amokmeren mesüdaktsütsü. Ni tasüngdangba ajak langzütsü," ta Vadra-i ANI dang break mapang ashi.

Pai 2019 küm agency nem kuli kaket 20,000 dak tema agütsügo, ta ashiba den pa jaokba ya yimden yimsüsüba dak sendaka lir, ta shisem.

"2019 küm kuli kaket 23,000 agütsüogo. Parnoki kü dang asüngdangba ken o ya küm 20 tejen ken o ka lir. Iba ya yimden yimsüsüba dak sendaka lir. Onoki tsüdatepba mapang temzüng ozüng ajak sülen tashi anga anidaker. Ruling sorkari agency ya teti mashiyimi amshir. Parnoki kü dang kechi asüngdangner asüngdangang. Ni meimshitsü kecha mali," ta Vadra-i ashi.

Mongolbar anepdang Vadra par kidang nungi ED office-i jaja oa liasü. Pa jaja aodang osangbenertem den sensaksema mapang pai, ken

o dak sendakba nung temulung masüba lemsatep aser ken o nung kecha aibelena mali ta ashiba den bushisüngdang tatembang kati arutsü imlaba lemsatep.

ED-i pa jaokba ya yimden yimsüsüba tsütsü BJP pur mapa lir ta shia pai, "tatembang ka dangi arutsü imlar. Shitakba ken o nungi pila onüba mapang parnoki ni jaoker. Ni linük pusema jembiba mapang ni nokdanger; Rahul-a Parliament nung mejembidaktsür. Iba ya BJP mapa. Iba ya yimden yimsüsüba dak sendaka lir," ta ashi.

"Nüburtemi ni meimer aser ni yimden yimsüsüba nung shilem agidaktsüner. Ni yimden yimsüsüba nung adentsü jangraba lemsatepba mapang parnoki ni atsüzüktsü aser shitakba ken o nungi pila-a aotsü atema ken o tejentem kakteter," ta pai shisem.

Paisa, agency den teka amteper inyaksü atema pa teti renema dang lir, saka kuli kaket meyirejang aika bentettsüba ya temela masü ta ashi.

Congress MP Priyanka Gandhi kinungbo Vadra-i, par kibongi temaotsü agütsüba agir pa yimden yimsüsüba nung dener ta shiogo.

Waqf Act ya taoba mapang aibelen metongshitsü atema lir: Rijiju



New Delhi, Rongchii/April 15 (Agencies): Union minority affairs minister Kiren Rijiju-i Mongolbarnü ashiba agi, Waqf Act amendments ya Muslim nunger dak rangloker inyakba masü saka taoba mapang aibelentem metongshitsü atema lir.

Kochi nung osangbenertem den sensaksema mapang Rijiju-i ashiba agi, sorkar tebilembajibo tangar ka ali tashiyim agi aser telok ka mulungka nung dang agitsü atema provision tem aliba ajak agintsü asoshi liasü.

Paisa, Waqf ozüng ya yanglushiogo, kechiyong provision kar ajanga Waqf Board tem nem tashi tali agüja liasü.

"Iba ya Muslim nunger dak rangloker inyakba masü. Iba ya taoba mapang aibelentem metonshitsü atema lir," ta minister-i ashi.

Union minister of state George Kurien aser state BJP president Rajeev Chandrasekhar nati meiner Rijiju-i ashiba agi, iba ozüng

yanglushiba sülen joko ali ka kecha talenba makai Waqf property ama sangdongba malitsü.

Iba amendment anema Muslim nunger telok balalai longkak aita aliba mapang ka nung pai iba olen lemsatepogo. West Bengal nungbo tesem kar nung mepetmsü tulu adokogo. Parliament-i agizükba Waqf Bill ya April 5 nü tir-i agizüka liasü. NDA-i iba ozüng ya minority tem atema tajangzük ta shiogo, saka opposition-i iba ya Muslim nunger anema lir ta shia arudar.

Kasa mapang nung April 14 nü Haryana kibok Hisar nung lokti senden ka nung o jembiba mapang Ato Kilonser Narendra Modi-i ashiba agi, Waqf ali ya sensakertem yaritsü atema amshitsüla, saka iba ya mashiyimi amshiba ajanga Muslim nunger tebur chanutem mapa tilateri dang inyaksüsa kümdaktsüogo.

Paisa, Waqf ali yagi ali mafia kar dang ajangzük aser atsüngzük aliba Muslim nunger kecha majangzük, ta ashi.

Bihar elections: Tejashwi-i Rahul & Kharge den ajurutep



New Delhi, Rongchii/April 15 (Agencies): Rashtriya Janata Dal (RJD) lenir Tejashwi Yadav-i Mongolbarnü Congress tir Mallikarjun Kharge aser Rahul Gandhi na den ajurutepogo.

Taküm küm tatemlen agitsü aliba Bihar assembly elections atema menden lemdangtsü aser tasa yanglutsü atema lenirtem ajurutepa liasü.

Senden amenba sülen Tejashwi-i ashiba agi, party ana tsüngda Patna nung ano senden ka amentsü ta shiogo.

"Tasa asatsü atema Congress aser RJD na Patna

nung senden amentsü. Bihar tejakleni anir aotsü atema onok bendanga agütsür lir," ta Tejashwi-i ashi.

"Bihar nung sorkar ya küm 20 buba aser küm 11 bo PM Modi tekolak ser arudar. Ajisüaka Bihar ya state tem nung rongsenketzüng nung kanga atsüngzük aliba state ka lir aser per capita income ajak dang ishiba, aluyimertem income tajemba aser state toktsür tangaleni aoertem timba lir," ta pai shisem.

Ajisüaka Tejashwi-i Bihar nung chief ministerial candidate indang asüngdangba indang

telangzüba tejangja magütsü. "CM atema nenok kechiba shisabulur memetet. Onoki telemtetba ka agitsü. Kechi tejangja ta süra Bihar nung NDA sorkar tanaben marutsü. "Onoki ajaki election ya ken o balala dak ajemdaker raraner. Onok opposition nung lir aser sorkar metongmejen nüburtem nem metetdaksütsüji onok khuret lir," ta pai shisem.

Senden indang jembiba mapang RJD lenir aser Rajya Sabha MP Manoj Jha-i ANI dang ashiba agi, "Iba ya formal senden ka lir. Onoki Congress party ally tem reprangdangra tang tashi nungbo RJD ya ajak dang tejenba lir. Senden nung item ajak ya sensak asemtsü."

Kasa mapang nung Congress-i ashiba agi, iba ya party kecha indang "B-team" masü aser opposition alliance atema chief ministerial candidate ya election tembangba sülenang telemtetba agitsü. Ajisüaka RJD-i, Tejashwi ya Mahagathbandhan indang chief ministerial candidate ama züngshir.



TIR YIMYIM YIMOBILEM (EDITORIAL)

DIMAPUR WEDNESDAY, APRIL (RONGCHII) 16, 2025

Inyakyim maliba lima

A khidangbo minister kati shiti, chit, ka dang agütsü nung contract aser supply mapa angu aser teinyakertemia shitak inyaker külenang tajangzük agi. Kasaji, government mapa nunga minister kati shiti ka zülutsübaji 'Appointment Order' den kasa liasü, kechiyong iba shiti ajanga government mapa angu. Iba ama shiti ajanga mapa anguba purtem aika department aika nung tematiba menden tashi tua mener alitsü. Item jagia pei akok tashi mapa shitak inyaksü meranger südi. Ibaji asen lima nung tazüing-temeteter peria maliba putu mapang ka nung liasü. Ajisüaka, tanü putubo yashi putu ama masü, tazüing-temeteter aser tashitemeteterem agir magima adokba den gari nung senzüba dang nungibo tayimtsü nung senzüba jenjang dalangba aser bank aser dokan tashi tsüingdong mouaka kidang mener senotsü agizüka shishilembatetba putu nung asenok alir. Aji oda, asenok tenüing, tsürabur tenüing aser tasoba anogo ajak joko internet system nung iadoker mashi mapang ka nung ajaki reprangtetsüsa inyakyim nung tokja lir. Iba ama mapang ka nung asenokbo tang tashi contract aser supply mapa inyaksü asoshia chit dang amshiteper südi aser yimten tashi amshirtemi mulungba purtem nem dang mapa agütsür südi. Iba jagi Nagaland nungbo kecha department indanga mapa inyaksü asoshi 'tender notice' agütsüba mangur. Nagaland nung gari lenmang junga meyanglutetba, government kiojen shitak merenemtetba aser kiojen yanglushiba nung nübortem sen tapayu mali amshiba ajak ya tanü putu den sütepa inyakyim maliba ajanga lir. Aji oda, kodang nübortem asoshi government mapa ka inyaksü atema ajaki meteta ajak nem maongka agüja 'tender notice' magütsüliir, idakji asenok ajak agitsüsa shilem lir, anungji ni tulubalenka agir, nenok nem tilala lemstsür tanüingba sen tera jagi mapa mashimashi inyaka toktsütsü aser Naga nunger okratemi aji kecha shishia mebilemstsü. Kasaji, government mapa nung tanü Higher Education nung tesayur noklang dak tema tatidang magi ser regular kümtsüba anema lokti tentetemi ola adokba ya, tanga masü, Nagaland government inyakyim tanü putu yimya den sütepa maoba ajanga lir. Ashi, nüngdak adokba mapang tesayur shimtsü asoshi yimjak nung 'Advertisement' agütsür shim nungbo, iba ama inyakyim dak maketba tebilemstsü agi government nung alirtema timmedemla aser mapa nung alirtema makoksala. Aji oda, mezüing nungisa masüyonga teinyakdak purtema tatidang ka ajanga shimtsüsa maongka ka agütsü nungbo koda jungla ! Mapa ajak rongnung tesayur mapasa tongtibangba, kechiyong tesayuri sayuba amaji dang kaketshirtema akümtsü, anungji tesayur shimdangsa balaka jungjunga tendanger külenang shimtsüla adoker. Aji oda, asenok taliba jenjang aser achiajem yimyabo tanü putu den sütepa saka inyakyimbo akhidang 'chit' ka agütsür gari lenmang ajunga tudaktsüba ama aser chit ka agütsüba agi government mapa tajung angu ama kasa inyakyim nungsa lira, iba yimten aser inyakyimjibo tanü lanurtemi maremstsü. Tanü Nagaland nungbo contract mapa tulu aser tajungtembo yimten yimsüsürtemi parnok chirnurtem tenüing nung dang inyaker, anungji yimsüa ni asür aser contract mapaa ni inyaker, iba jagi Naga nunger okratem mapa mangu timatemer. Tang state nungbo yimten nung alir kinungertem nem dena govt contract mapa magütsür, ashiko, Nagaland nunga tenüing agibo yamaji lateta alitsüa akok, ajisüaka okratem alidak inyakyim shitak beshibaji tamashi amato nia aser nai bilemer. Iba jagi shitak inyakbaji tai amato aser tai inyakbajing shitak amato ta asüba limaji Nagaland kümogo. Nagaland nungbo nisung shibai mauyatetlir, pa mesüra laji matumara tagitsü mait nisung asütsü. Ibayongji, kidang kinungtsüia kinungbo dang office nung auyatsü ajungshir aser kinungbuia kinungtsü dang auyatsü lenmang sayur. Ibayongji, tetsür o tebur na toktepa auyaba sen agi takar akümtsü merangba limajia Nagaland-sa kümogo.

OLEMSABANG

TEMZÜNG OZÜNG ASERO BENDANGBA (MEZUNG TANGAZÜKTSÜ)
LAW, CONSTITUTION AND ADMINISTRATION OF JUSTICE
(FOUNDATIONAL CONCEPT)

~ L. Moayanger Imchen

Senior Govt. Advocate, Gauhati High Court Kohima Bench.

Meten O (Justifying Note)

Mezüing ali aser anüing pokteter kelen nungi meimchir/nisungsanglai pei sasa pa apokdak aser sobalibatsü asoshi temzüing ozüing bushia yanglua amshia aru. Kechiba süra nisungji Teyanglur Tsüngrem pa mesükba nung tajung aser tamajung bendangtetsü aser mettetsü shisatsü inoka yanglu. Nisunger sobaliba yimya jayajako agi tajung aser tamajung bendangtetsü aser asadangtetsü makoker dangji sowar mesura shiruru mesük ta ajar.

Shisarajem puti shirnokisa kanga nendaka aser taroki yia bushi züingdangtir aser bushitetir parnok laishiba nung zülua aliba aienket O koba tesüingjem aser tekümtet shisatsütem lir aji angutsü aser ajurua metetsü. Kodang laishibai sayuba aienket O pai bushitetba aser angatetba shisarajem den külemi puteptetta aser item ajakji asadangteta pai pa taküm nung aji amshitetir, iba shisashir jagi tangari mungütetba aser metongtetba teperi aser tabensa pai tongtetsü, iba dangji Tsüngremer shisatsü tera ngutetba ta ajar. Maneni kodang nendaka shisabushir jagi pai bushiteta metetbaji teimi asadangteta, libalirua aser pai tangardang inyaka sayutettir, pa dangji alima shisatsü angatet agi tashitemeteter ta ajar. Tanü tashi nung tashitemeteter den tokteptsü mesüra apiteptsü kecha rongsen aser senti oset bushiteta mali aser maka.

Kechisarena shisarajem bushizüingdang ajak nung Tsüngrem aser Laishiba tesayuba majangi kecha tejangja shisatsü ngütetsü aser apijema rateta metetsü tamakoktsü. Kechiba sura anasatiba tatishitsü agi tesangwa aser tamang na lemdangtsübaji Tsüngrem ajanga pai pa shisatsü jungkai adokdaktsüba lir.

Temzüing Ozüing tetenzükdak (The Origin of Laws)

Temzüing Ozüing ya kodang taroktibai yia bushitir aser rajemtsü merangdir iba ya Tsüngrem nungi agütsüba ochi O nung amendaka lir. "Kibuba Tsüngremi nisungji anir arua Eden atsüki inyakdaktsütsü aser anüktsü yutsü. Kibuba Tsüngremi nisung nem ozung agüja ashi, atsüki nung adangba sungjang ajak nai achitsü akok, saka tajung o tamajung na metetba sungdong nungi nai machitsüla" (Lipok 2:15). Iba Tsüngrem putipuyang O nungi temzüing ozüing nung tashimangaba agi Tsüngremi meimchir dang temerenshi agutsüba asenoki angur "Aser Adam dang Tsüngremi ashi, kechi sungdong nungi ni nü dang techi ta 'ashi saka nai achi nung na atema ali nungji adakatem kaor, na arishi tepiyong belemseta inyakerang na chiyongtsü angutsü" (Lipok 3:17). Iba ya Teyanglur Tsüngremi meimchir dang temzüing ozüing amshia mezüing O bendang yimden yimli amshiba lir.

Temzüing Özüing ya kechi (What is law)

Kodang asenoki law ta angashir asen mulongjangi temerenshi ta aita angatetter, iba tangatetba ya kulenbo kanga dang shitak saka iba ya law rangben terajem tangatetba masü, kechiba sura law ajanga temeten-a agutsür. Akhi alemli nungi tenzüka asen aliba lima ya temzüing ozüing agi alenbanger alir, alima ajunga nung temzüing ozüing makaba linük aser lokti mali. Senso shia pei mezüing tatashilok teinyaktsü mapa kaji pei linük temzüing aser ozüingtem metettsüla aser item kübok lirometema litettsüla. Ajaki metettsü tongtibangtiba kaji temzüing ozüing ajanga dang lokti sobaliba, yimden yimli, tamangba yimsü yimpong aser item mesükba meimchir putipuyang ajak tejakleni renloka aser melenshia aoer. Iba dang alima renloka aienba ta ajar. Tar nunger longsü putu mapang nungi tang tashi nisunger yimyaliro, yimkong sobaliba, yimden yimli, tamangba yimsü, lipoklisang aser iba den sendakba putipuyang inyaksangshi ajak temzüing ozüing nung tena lir.

(Maneni asüing adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüingeri angateta agitsü mepishir

India nung Catholic putir merenshiba police dang kecha mashi

Bhubaneswar, Rongchii/ April 15 (Agencies): Odisha anüdoklen yimtsüing ka nung police temi Catholic putir ana aser tribal tsür ka merenshir hopta asem sülen arogo lenirtemi ashiba agi, Hindu yimsü tsütsü tejak shir aliba state sorkari tang tashi parnok anema mapa kecha meinyak.

Gajapati district kübok Juba yimtsüing nung parish priest Father Joshi George-i UCA News dang April 15 nü ashiba agi, March 22 nü atalokba dak sendakba nung police mesüra sorkar ketdangsüri mera agiba osang mangashi.

Police temi George, pa assistant Father Dayanand Nayak aser tekülem ki müreka alir tetsür ishika dak züka merenshia liasü, aser ibai Khristanpur dak tenük yoker amakba lir ta ashir.

Tetsür police tanishir Joshna Roy-i anir police team kati Hindu nunger dang kecha mashi saka Khristanpur dak tuteta tenük yok, ta George-i ash.

Hopta asem sülena police state sorkari mapa kecha meinyakba ajanga ibai tenük yoker mera agiba lir ta jembiba medentsür, ta putiri ash.

"Kiyonger yimtsüing ka nung sorkari lapokba school ka nung Catholic tesayur kati marijuana ayoker ta police temi ken o tiazü ka benok. Pa tangbo mapa nungi anentsüogo aser Hindu nunger tesayur ka apuba police temi chiokogo," ta George-i ash.

Kuli tejangja bushiba team kati April 13 nü "Police turned from Protectors to

Perpetrators" nüngja agütsür report ka agütsüba nung police temi ajok ama süng talang bener arua nüburtem dak azük aser tribal kin ka nungi tetsürtem dak tim masüba yimya amshi ta shia liasü.

"Tanur, tetsür aser Catholic putir ana dak tetsübu, tarendak aser mamangtetba lir. Administration ajanga yamai inyaksü bilema meliasü," ta report nung ash.

State indang puti otsü nung police temi Catholic putirtem dak tenük yokba, züka merenshiba aser yimtong süa anir jajaba ibai mezüngbuba lir, ta ash.

Marijuana tsünür ta osang prokshiba sülen police temi anasa yimtsüing ka meita ao. Ajisüaka yimdaklir tem ain adoka parnok den raratepba sülen police tem meyipa ao, ta report ajanga ash.

Juba yimtsüing ya ajanga yimtsüing ishika senzür. Tasüing police tem arudang Kondh tribal tsür ana (ka arishi küm 20 aser ka 18) aser arishi küm 12 tekübok tetsür ana tasüing Deobar sentep sentong asoshi Juba parish tekülem kidang mürekmejua renemshia liasü.

Police 15 shi arua tekülem kidang tetsür ana dak süng agi azük aser meters 300 shi pilar police bus ka alidaki atsür ao.

Aji ngua tetsür chanu ana yagi putir dang teyari meshia ayimten. Ola angashir putir aser kidang yariteper tem aru, saka police temi parnoka merenshi.

Putir anaprong dak azük aser police bus alileni atsür ao

aser nisungtem tamangba yimsü melendaktsür ta tai tonglochtsü. Khen Nayak süchia ao aser lao, saka bus alidaki atsür ao, ta report ajanga ash.

Police tem warrant maka tekülem ki telungi aita mürekmejuba oset raksatsü, tekülem kidang temeshi tesem ka menentsü, aser tamangba yimsü mezüngmeshia o tamajung jembi.

Tamangba yimsü kumzüka ayutsü aser tamangba yimsü temeden asoshi yangluba ozüing nung police aibelen aser temerenshi agütsü langa mapa tamajung inyak, ta report nung shia liasü.

Police temi yimdaklir indang ki, motorcycle aser television sets 20 shi ki telung nung raksatsü, ta yimdaklir temi fact-finding team dang ash.

Ano police temi jang aser entzü yua aliba agizüka indoktsü. Iba arogo ketdangsür Berhampur diocese ajanga April 8 nü local police station nung police anema ken o benok.

Hindu nunger bhukumba BJP ajanga iba state nung yimsü asür aser police anema ken o benoktsü asünungji parnoki legal experts den shisa agitepdang ken o menur ang agütsü, ta Bishop Sarat Chandra Nayak of Berhampur ajanga UCA News dang April 7 nü shia liasü.

2024 küm June ita BJP sorkar kumtetba sülen state nung Khristanpur dak tenük yoker mapa tamajung inyakba tali kumogo, ta Khristan lenirtemi ashir.

ANO GO ABEN TSÜNGREM DEN

Kishizüing nung temenen monga lir

Nai tajung benshirabang na magizüktsü ama? Aser nai tajung mebenshirabang kishizüing nung temenen monga lir. Lipok 4:7.

Kodang tatitangba asen mulungjangi aiter, asenoki iba madak takok mengura, iba yagi asenok madak kibur akümtsü aser tamajung mapa dangi anitsü. Tatitang tenzükba mapang shimtetba mapangji lendong. Aika tom ta nung alir.

Tsüngremi Kain dang mepelar aser Abil dang pelar ta pai metetta liasü. Tenükmerema bilemba agi Kain mulungjang nung shisatetdaksü. Kechi inyaksüla ta Kaini shisadanga alidang Tsüngrem O pa dangi aru. Pa mulungjang kishi züing nung temenen monga lir ta Tsüngremi pa dang tekümdangtsü ash. Tang temenenji zübazüba agitsüba masü, temeneni kecha tamajung meinyaksü ta bilemtsüba masü. Tang temenen madak takok angutsüba mapang aser toktsütsüla. Kaini temenen madak takok mangu, temeneni takok angu aser pa taküm raksatsü.

Meimlaba mapang nung tatitangba arur. Tenük merem agi ne mulungjang amaktsü tenzüker. Ne tebilemba aser mapa nung Tsüngremi mepelar ta Tanela Temeshi-i ne mulungjang nung zülur. Iba mapang nung ne mulungjang nung temeneni akoshiba koktettsüla. Temeneni raksatsür, temeneni tasüba bener arur. Temenenji kazütsü oset ama mamshitsüla. Kain nem agütsüba kasa tekümdangtsü Tsüngrem Oi ne danga ashir. Ne mulungjang kishi züing nung temenen monga alibai ne dangi teraksa bener marutsüdang aji koktetang. Pai ashiba nung temulung agüjang aser nai na asoshi aser tangar asoshi timtem paidoktettsü.

Nigeria nung Khristanpur 50 dak tema tepset

Abuja, Rongchii/April 15 (Agencies): Ita tetenzüklen Plateau state, Nigeria nung Khristanpur nisung 60 dak tema tepsetba sülen ano kasa state nung Khristanpur timba aliba tesem ka April 14, 2025 anepdang amakba nung asür nisung 51 jungogo, ta osangtem ajanga ashir.

Hombarnep Fulani shiruru metsür temi Kwall District, Bassa County kübok Zikke yimtsüing amak, ta yangji alir Blessing Yakubu-i ash.

"Plateau state indang Bassa Local Government Area nung Kwal district kübok Zikke yimtsüing nung amakba mapang Khristanpur nisung 40 tepset," ta Yakubu-i Morning Star News dang text message ka ajanga ash aser mapang tatsüka lir asür nisung 51 jungogo ta ash. "Nok-nü bena aliba Fulani shiruru metsürtemi anepdang amakdang nisung takum sama aser ki o jen raksatsü."

Hokulbarnüa (April 11) shiruru metsürtem südi ta temulung melemi aliba telok

kati Bassa County nung Khristanpur timba aliba Zogu village, Miango District nung kibong ka nungi züingsem asem tepset, ta yangji lenir Sam Jugo-i ash. Par asem ya arishi küm 56 tan Weyi Gebeh, par jabaso arishi küm 25 tain Zhu Weyi aser arishi küm 16 taon Henry Weyi liasü, ta pai ash.

Bassa nungsa shiruru metsür temi Mongulbar (April 8) aonung Khristanpur timba aliba yimtsüing asem amak aser nisung ana asü, ta Bassa kübok Miango District nungi lokti lenir Joseph Chudu Yonkpa-i ash.

"Fulani militias temi Hwrra yimtsüing nung ozü adianutem tepsetba rema yutsür ghonda 24 ajung-majungka nung kasa telok yagi April 8 aonung tesem asem amak. Item Fulani nisung tepseter yagi tesem balala asem - Kwall district nung Kperie kübok Zashi; College of Accountanct, Kwall anasa MODACS Hostel aser Miango District nung Twin Hill (Gyu) amak," ta Yonkpa-i sangdong ka nung ash.

Zashi nung Abba Sunday

Ngah (19) tepset aser pa indang motorcycle auya, aser Kwall kübok Modacs Hotel tesülen arishi küm 47 tain Azie Daniel tepset, ta Yonkpa-i ash.

Miango District kübok Twin Hill area nung alirtem tera agi takum kumzüik, ta pai ash.

Item lendong ya küm aika item tesem nung azüdokshi aser alu nung tsünütsü raksatsüba nung shilem ka ama lir, ta pai ash.

"State actors tem ola madokba atema onoki kanga khuret süa bilemer, aitsüba maliba aser ozü nübur semdang maliba atema jashia bilemer. Item mapa tamajung inyaker aputsü mera magir aser anogoshi ozü nüburtem maneni tepsetba atema tali tebilemstü akar," ta Yonkpa-i ash.

"Fulani nunger temi kechi aginer? Parnok tesem ajak nung lir aser asen Khristanpur amaker. Bokkos Local Government Area nung Khristanpur tepsetba mang meyimzükdang Bassa Local Council Area nunga

Khristanpur aika tepset," ta Plateau state nung alir David Yakubu-i ash.

Muslim Fulani ya kin noklang aika lir aser Nigeria nung million aika lir aser saka ishikati radical Islamist ideology sülen anidaker, ta United Kingdom indang All-Party Parliamentary Group for International Freedom or Belief (APPG) ajanga 2020 report nung ash.

"Parnoki Boko Haram aser ISWAP tasa mesüka amshir aser Khristanpur dak tenük yokba tejangja sayur," ta APPG report ajanga ash.

Nigeria nung aliba Khristanpur lenirtemi ashiba agi, Nigeria indang Middle Belt nung Khristanpur dak amakba ya tashiyim agi Khristanpur ali kimong agia Islam yimsü benoktsü tangatetba nung inyaker.

Alima nung Khristanpur alitsü asoshi linük tamajungtiba tem rongnung Nigeria ya ka lir, ta Open Doors indang 2025 World Watch List ajanga ashir. Open Doors ajanga mapang

telatet ka indang osang abenba mapang alima nung Khristanpur 4,476 tepsetba nungi nisung 3,100 (shilem 69) Nigeria nung lir.

Nigeria nung Khristanpur ya North-East aser North-West dang nungi North-Central zone nung timba lir, kong Islamic extremist Fulani militia temi aluyimer aser talisa Khristanpur dak amaker, ta report ajanga ashir.

Boko Haram aser Islamic State in West Africa Province (ISWAP) nungi jakzüka aoba telok tem ya linük northern tsütsü kanga yakyaka lir, kong federal sorkari junga yimsü mesüteter aser Khristanpur aser sanga kin dak maneni amaker. Rongsen agi alangzüktsü mechi nisung pua bener aoba tang tali kumogo.

Azüdokshi ya southern state lenia prokshia ogo aser Lakurawa ta sür jihadist kiralongrar telok tasen ka northwest nung pokteta lir, aser parnok ket nung nok-nü tajung lir aser radical Islamist agenda nung ajemdaker lir.

AO OSHI ANGAZÜKDAK:**TANÜ ANGAZÜKTSÜBA OJANG****Temeli**

(n) tebang telonglen o adokdaksüba tenüktelen (tongue)

* Teti temeli merüka ayutsüla.

Temena

(n) mateptsü akokba oset (sticky)

* Angi temena agi ozü aika ashi.



Tir Yimym

OLONG PAITEP # 7124

1		2		3		4	5			
				6						7
		8								
9				10		11				
			12					13		
						14				
16						17				

TIPLIN

1. Nisung jenti
4. Tsük rudenba
6. Temzüng tesashi
8. S___i
9. Nisung rongnung telemasa
10. Anogoshi
12. Ajanga aor
13. Tsük rizüngdak
14. Tebang nungi adokba
16. Süngdong tatembangtiba
17. Meputep

- (5)
- (5)
- (5)
- (3)
- (3)
- (4)
- (4)
- (3)
- (3)
- (5)
- (5)

LANGTSÜNGLEN

1. Tenük telong
2. Committee dang ajar
3. Yagi ki okdoker
5. Yim lenmang
7. Temoatsü keter meyipa aruba
11. Kanga junga menemba
12. Kenyongi majinü
13. Rong kanga tulu

- (9)
- (5)
- (7)
- (5)
- (9)
- (7)
- (5)
- (5)

OLONG PAITEP # 7123 TELANGZÜBA**TIPLIN :**

1. Tanga, 6. Wara, 7. Rajang,
9. Anük, 10. Jenjang, 11. Alar,
14. Ngashi, 15. Nala, 16. Mechi.

LANGTSÜNGLEN :

2. Anga, 3. Yabang, 4. Tarok,
5. Orak, 8. Ainer, 9. Anema,
10. Jabili, 11. Among,
12. Miim, 13. Anem.

NAI-A YA METETTER MA

Verge Motorcycles-i Guinness World Record tasen ka yangluogo aser iba ya electric motorcycle kati single charge nung talangtiba aoba lir. March 22, 2025 nü Verge Motorcycles ajanga yangluba TS Pro model ajanga London nung kilometer 311 jungnüa ao.

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimym bureau tem nung agüjang.

India nung mezüngbuba boilerless sugarcane plant Assam nung amenok**Guwahati, April 15, 2025**

(Agencies): India nung mezüngbuba boilerless sugarcane processing plant Assam nung amenokogo. Hojai district kübok Bamungaon nung iba plant amenok.

Punjab nung amenoka aliba Spray Engineering Devices Limited (SEDL) aser Ecotech Agro Mills ajanga plant yanglu.

Iba plant nung anogoshia (TCD) processes sugarcane 500 tonnes tashi high-quality jaggery menüngsatsü akoktsü. Iba ya smoke, steam, mesüra

industrial waste kecha melii dang inyaksü ta SEDL ketdangsür kati ashi.

"Iba boilerless plant amenokba sülen kümshia sugarcane 1.8 lakh tones tashi menüngsatsü sayuogo aser bagasse 60,000 tonnes tashi kümzüksü" ta ketdangsürisa ashi.

Iba plant anameta ali 800 bighas nung moji alu lir aser iba ajanga supply angutsü ta paisa ashi.

Assam nung ali 29,000 hectares nung mojilu yima arur

aser kümshia jaggery 1.35 lakh tones shi adoktsü lenmang lir. Ajisüaka, processing units tajung maliba ajanga tangalen nungi ang jaggery aser sugar bener arur.

Manipur nung lipoküm wazüka ayutsü aser yimyatsüya tajung benshidaktsütsü atema nükjidong nung iba mapa inyaker. April 15, 2025 nungi single-use plastic products noktanga sülen tanga tesemtem nunga iba mesükba mapa inyaka aotsü ta ketdangsürtemisa ashi.

Imphal nung ketdangsürtemi banned plastic seret 216 apu**Imphal, April 15, 2025**

(Agencies): Manipur sorkari Imphal nung single-use plastics anema inyaka aodang seret 216 puogo.

Imphal kübok dokan 16 nungi ketdangsürtemi banned single-use plastic items apu. State sorkari 2022 nung noktanga item dokan nung

plastic products maneni ayokba putet.

Directorate of Environment and Climate Change, District Administration, Home Department, Manipur Pollution Control Board (MPCB), aser Urban Local Bodies o Panchayats nungi teshimtet nübotemi iba mapa inyaka liasü.

Ketdangsürtemi dokan shia dang Rs 12,000 senchi achi. Manipur sorkari April 15, 2025 nungi single-use plastic products noktangsü osang agütsüba sülen iba mapa inyakogo.

April 7 nungi sorkari public awareness campaign ka tenzüka agia arur.

Meghalaya nung nisung lakh 6 jungnüa Aadhaar yanglua mali**Shillong, April 15, 2025**

(Agencies): Meghalaya nung nisung lakh 6 shi ka ket nung Aadhaar mali aser iba ajanga sorkar welfare aser development schemes magiteter.

State sorkari Unique Identification Authority of India (UIDAI) database kübok senso ajak dendaktsütsü atema mapa inyaker.

East Khasi Hills aser West Garo Hills nung ketdangsürtemi ashiba agi nütsüng teimtiba aliba

district ana nung Aadhaar coverage 75% aser 83% dang lir.

Iba ajanga nisung 3.27 lakh tashi Aadhaar mali. East Khasi Hills nung nisung 2.31 lakh register masü aser West Garo Hills nung nisung 96,400 tema Aadhaar mali lir ta ketdangsürtemisa ashi.

"Onoki nisung ajak UIDAI kübok dendaktsütsü atema meranga inyaker. Tang nisung lakh 28 shi state nung enroll süogo saka tesem kar nungbo

nisungtemi Aadhaar yanglutsü nungnanger" ta ketdangsüri ashi.

West Khasi Hills nung 68% aser South Garo Hills district nung 67% Aadhaar coverage lir.

Meghalaya-i tawa tu tanurtem aser taintem Aadhaar verification atema mandatory biometric updates inyakba atema national award ana tashi ngutetogo.

Aadhaar teloki arishi küm 5 ser teküpok tanur 37,000, arishi küm 5 nungi 18 tsünga lakh 6.93 aser arishi küm 18 tema lakh 20.67 tashi enroll süogo.

"Meghalaya nung field workers, district officials, aser technical teams-i anibelem arema inyakba atema tenüngsang agütsür" ta State Nodal Officer for Aadhaar, Joram Beda-i ashi.

"Onoki akokba tashi Aadhaar outreach tajungba inyaksü aser Meghalaya nung senso shiai parnok unique identity aser nüngdakba government schemes ngudaktsütsü" ta Beda-isa ashi.

Pakistan nung kibong 44,000-i polio vaccine magizüker

Islamabad, Rongchii/April 15 (Agencies): Pakistan nung polio vaccine agitsü memulunger kibong timtibaji Sindh province yimtiba aser linük indang rongsenketzüng tesep Karachi nungi lir. Iba statistics ya linük indang federal health minister Mustafa Kamal-i metetdaksü.

Karachi nung osangbener senden ka nung jembidang, anti-polio campaigns aliba mapang iba yimti nung kibong shilem 85-i par tanurtem nem polio drops agütsütsü memulung, ta Kamal-i ashi.

Tang Pakistan nung kibong 44,000-i pei tanur nem polio vaccine magütsüdahtsür aser item rongnung cases 34,000 ya Karachi kisüng nungi lir, ta Kamal-i ashi. Ibai polio vaccine agitsü memulunger shilem 85 nungi 90 tsünga lir. Pai iba mapang Karachi nung polio virus aliba aser tanurtem temang tenük-telen meshidak kumdahtsüba nungi nokdangtsü asoshi vaccine agütsütsü nüngdakba indang nenshia ashi. "Ner tanur nem vaccine magütsüba ya mapa tamajung ka lir," ta Kamal-i ashi.

Pakistan nung polio vaccine agitsü memulungba cases ya tebilemtsü tulu lir ta minister-i ashi aser tang Afghanistan nung

linük dang nungi tuluba anti-polio vaccinaton sentong agitar ta ashi. Linük ana nung kasa mapang iba ama campaigns agiba tang mezüngbuba alitsü.

Afghanistan nung tanurtem nem kiboksema vaccine agütsüba nung Taliban-i yarir, kong küm ishika tsünga iba virus samatsü teimla lir, ta Kamal-i ashi.

Pai Pakistan nüburtem dang osang tiazü mamangtsü aser pei tanur nem polio vaccine agidakja alima nung polio aliba linük tesüsaba mekumdahtsütsü ayongzüka liasü.

Alima nung polio virus ya wara ka ama linük anaji Pakistan aser Afghanistan ya dang lir. Kibong temi vaccine agitsü memulungba ajanga item linük nung virus ya alir.

Iba den külemi kiralongrar telok temi polio health workers dak tenük yoker amaker. Kamal-i ano linük tesem ajunga nung polio vaccination campaign ya April 21 nung tenzüksü, aser yangji polio workers 415,000-i shilem agitsü ta sangdong.

Pai nüburtem dang item workers akumtsüboa aser amalitep akatsü ayongzüker, shirnok tanur indang tarutsü tia kumzüka ayutsü asoshi meranga inyaker.

Rara tenzükbata tema Trump-i Zelensky dak tai tongloktsü

Washington, Rongchii/April 15 (Agencies): Russia-i Ukraine maka nisung 35 tepsetba den nisung 117 yirutsüba sülen anogo ka lir Russia den rara tenzükbata tema Donald Trump-i Volodymyr Zelensky dak tai tongloktsügo.

US tir-i ashiba agi, Ukraine rara nung nisung million aika asüba tema Russia tir Vladimir Putin den kasa Ukraine nunger lenir daka tai tongloktsütsüla.

"Nü dang nungi metsüben agi tuluba ka den rara menar nüburtemi nü nem missile agütsütsü ta imla malitsüla," ta pai White House nung osangbenertem den sensaksemba mapang ashi. Paisa, iba mangatettep asoshi taoba US tir Joe Biden dak tai tonglokja liasü.

Russia-i Deobarnü Ukraine kübok Sumy yimti amakba tema alima kin balalai Russia aitsüba mapang ka nung Trump-i iba olen ya lemsatepogo. Deobarnü Sumy amakba ya taküm Russia-i civilian tem amakba tesashitiba liasü.

Iba yimti amakba indang asüngdangba mapang Trum-i ashiba agi, iba tatalokba ya kanga majung aser pa dang

Russia-i aibelen mena ta shiogo, ta metetdaksü, saka iba dak alaka osang tejangjaba magütsü.

"Nisung asem atema nisung million aika süogo," ta Trump-i Hombarnü ashi. "Putin ya mezüngbuba, Biden shibai pai kecha inyaker memeteti liasü, pa tanabuba aser iba sülen Zelensky."

Russia-i 2022 küm February ita nungi Ukraine amak tenzükbata sülen nisung meyirejang aika tepsetogo aser yirutsügo.

Trump-isa, Ukraine nunger lenir ya teti missile alitsü atema dang jembishinüa alir, ta ashi.

"Rara ka tenzükbata mapang nai akoktsü makoktsü metettsüla," ta US tir yagi ashi.

Tir mapa agizükba sülen Trump-i Zelensky aiben aija arudar aser taoba mapang rara tenzükbata tema Ukraine aitsügo.

February ita White House nung mangatettep adokba sülen tena tsünga tensa mejungi lir. Senden nung Trump-i, World War Three adokdahtsütsüsa inyaksangshiba tema Zelensky aitsü aser yimjung asoshi Russia den yakta sensaksem metenzükba tema aija liasü.

"Ibai Kibubai yangluba anogoji lir, asenok pelatepdi aser idakji pelaa lidi."
- T. Ken 118:24

MULUNG NEN O

Onok Prof. A.Lanunungsang Ao-er kinungertemi shirnokisa ozü mangyim jashi mapang onok dang meima yaritepogo, nenok ajak den onoki kanga pelaba lemsateper. Nenok sarasadem, nebo, rongsen aser tesünap o tajung agi onok mulung kanga anisüngzüko.

Talisa onoki item dang ya pelaba shisemer :

- Sentong yanglur aser Shilem agirtem ajak.
- Onok den külemi mangyima jajar Tembar, Medemer aser Kinungertem.
- Sentong ketdangsüa sarasadem nung yarir Arogo aser Sannükertem
- Külem Inyakertem, Kaketshirtem aser Kaketreju balala nungi arua pa nem tetushi agütsürtem
- Onok nungita yarir Putu menden, Lokti lenirtem aser Lokti tentettem.
- Medical Teams aser pa dang kanga meima anepalurtem.

Onoki nenok nisung shia tsüngdong arua pelaba meshitetaka, nenok temeim mapatem agi onok mulung tashi itdahtsüogo aser pa nema akhüm tetushi tulu agütsüogo ta metetdaksüner.

" Kibubai agütsü aser Kibubai bener ao, Kibuba tenüng moajang."
- Yob 1:21.

- Prof. A. Lanunungsang Ao'er Kinungertem.

OFFICE OF THE
MANAGING DIRECTOR
NAGALAND ECOLOGICAL & SANITATION MANAGEMENT SOCIETY (NESMS)
Govt. Regd. No. Home/SRC-6645/dtd-19-12-13.
A formed Society under Ministry of Road Transport & Highways (Road Safety) Govt. of India.
PFMS UNIQUE CODE-NLMK00001037

Ref. No. ADVT-NESMS-25 Date. 15-04-2025

ADVERTISEMENT

Applications are invited for one (1) post of **Junior Assistant Engineer** at Office of the Nagaland Ecological & Sanitation Management Society, Kohima Branch, Kohima Nagaland.

Sl. No.	Name of the post	Number of vacancies	Salary	Location	Eligibility
1.	JUNIOR ASSISTANT ENGINEER	1	Rs.28,000/- P.M Fixed with T.A and allowances	Kohima	B. Tech in Civil Engineering with certificate in 1. AutoCAD 2. Etabs/Staadpro 3. Sketchup/Revit

Interested candidates may send their resume in this mail nesmstuli@gmail.com on or before **25th of April 2025**. Only shortlisted candidate shall be called for the interview.

Sd/-
(Shri. Lepzungchiba Jamir)
Managing Director
Nagaland Ecological and Sanitation Management Society.

Sudan kübok Darfur tesem nung nisung 300 tepset: UN

Khartoum, Rongchii/April 15 (Agencies): Sudan kübok Darfur tesem nung paramilitary Rapid Support Forces (RSF)-i hopta tatemi refugee camp tem amakba sülen civilian 300 tepsetogo, ta United Nations-i metetdaksü. Hokolbar aser Honibarnü el-Fasher yimti aser Zamzam aser Abu Shouk displacement camp temeket amakba sülen nisung 400,000 shi pei talidak ki toktsür jenshiaogo, ta UN International Organization for Migration (IOM)-i sangdong ka ajanga metetdaksü. Civil war tenzüker küm ana ajungaba mapang tang nisung aika asüba osang metetdaksüogo. Iba rara

ajanga nüburtem timtem tekangshi tulu nung lir aser alima nung humanitarian crisis tamajungtiba ta züngshir. Asürtem rongnung Relief International Sudan nungi humanitarian personnel 10 densema liasü, shirnok Zamzam nung health centre tem rongnung tatembangtiba achaayanga liasü, ta UN-i ashi. Satellite noksa ajanga Hokolbarnü camp nung ki arongba nungi mokozi adokba nguogo. Deobarnü tashi nungbo RSF-i Zamzam camp azüoker liasü. UN-i ashiba agi, iba tesem amakba sülen kibong 60,000 nungi 80,000 shi pei talidak ki toktsür jenshiogo.

Iba rara nung nisung 20,000 shi tepsetba den nisung million 13 pei talidak ki toktsür jenshiogo aser nisung million pezü shi kidanger linüktemi jenshiaogo, ta UN sangdong ajanga metetdaksü. Rara nung aibelenba tema army aser RSF naprongla aitsür lir. Taoba ita Sudanese Armed Forces (SAF)-i, linük yimtiba Khartoum RSF ket nungi meyipa agia liasü. Iba sülen RSF puri tesem balala tali amak tenzüker shirnoki Darfur region ajunga amai azüoker lir. RSF-i ashiba agi, Zamzam camp ya SAF puri parnok tamendakdak ama amshia liasü.

ALI AYOKER
At Kushiabill, Dimapur.
PLOT AVAILABLE AS PER BUDGET
Rate : Rs. 265/- per Sq.ft (Negotiable)

- **Contact No -**
9612242850
9615777083

Iyer-i ICC Men's Player of the Month naroküm nguogo



Rongchii/April 15, 2025 (Agencies): India nunger batter Shreyas Iyer nem Mogolbarnü March ita atema ICC Men's Player of the Month naroküm agütsüogo. India team-i Champions Trophy koka asayaba mapang pai kanga junga shilem agia liasü.

Iba asayamung nung Iyer ya run (243) timtiba yangluba asayar liasü aser pai New Zealand nunger asayar Jacob Duffy aser Rachin Ravindra na ajateta iba naroküm nguogo.

"March ita atema ICC Men's Player of the Month naroküm agütsüba atema kanga

pelar. Iba tetushi ya jangrademtsüka aser talisa onoki ICC Champions Trophy akokba ita atema agütsüba asoshi kanga pelar, koba ni teti menungra bilemtettsü," ta Iyer-i ashi.

"Sabang tulu ka nung India team takok asoshi teyari agütsütetba ya cricket asayartem ajak nukjidong ka lir. Ni teammate, coach, aser support staff ajak dang kanga pelar, shirnoki ni maneni nongita yariogo aser kü dak tamang kaogo.

"Maneni fan tem danga kanga pelar. Nenoki ajungshiba

ajanga onok maneni tejakleni aotsü ajungmesor," ta pai ashi.

India nunger asayartemi iba naroküm ya ita anabuba atonga agizükogo. Shubman Gill-i iba naroküm February ita agizüka liasü.

Asayamung tepeyong Iyer-i kanga junga asaya-a middle over tem nung India team len ania tasak tia aika nungi aniteta liasü. Team jenjang mejungi aliba mapang pai tongtibang shilem agiba ajanga team-i takok anguba nung teyari tulu agüja liasü.

Arishi küm 30 tain asayar yagi March ita asaya asem nung run 172 yanglu. Pa indang average 57.33 aser strike rate 77.47 liasü.

Group A nung New Zealand den asayaba mapang Iyer-i ball 98 nung run 79 yanglua India-i run 250 yangluba nung teyari agüja liasü.

Iba sülen pai semifinal nung ball 62 nung run 45 yanglua Australia akokba asaya nung teyari agütsü. Maneni New Zealand den final asaya nunga pai ball 62 nung run 48 yanglua India team takok dangi ania liasü.

G. Rio tournament: Dimapur-i run 284 agi Tuensang akok



Dimapur, Ringchii/April 15 (TYO): Nagaland Cricket Stadium nung tang asaya aliba 5buba Late G. Rio Men's U19 Tournament 2025 nung Mongolbarnü Dimapur-i run 284 agi Tuensang kokogo.

Mezüng batting amenba sülen Dimapur team-i over 47.4 nung asayar ajak out ser run 308 yanglua liasü.

Dimapur team nungi Anirudh Yadav-i ball 86 nung run 102 yanglu aser Shiva Yadav-ia run 61 yanglua liasü.

Tuensang team bowler tem rongnungi Shumrista-i over 10 nung run 57 agütsür wicket 3

agi aser Phololi-ia over 10 nung run 75 agütsür wicket 3 agia liasü.

Tanabuba innings nung run arishiba mapang Tuensang team-i over 11.5 nung asayar ajak out sür run 24 dang yanglua asaya makok.

Tuensang team batsmen tem rongnungi Zakaria Hussain-i ball 32 nung run 5 yanglua pai ajak dang run timba yanglua.

Dimapur team bowler tem rongnungi Samir Ali-i over 3.5 nung run 3 agütsür wicket 6 agia liasü. Pa nem player of the match naroküm agütsü.

Mkg. nung MDFA-i Zonal Association mapatong tenzükogo



Nagaland Legislative Assembly Speaker & Chairman DPDB Mokokchung Wb.Sharingain Longkumer-i MDFA nukjidong Zonal Association tenzüksüba sentong agir kelen MDFA lenirtem den tangokba noksa.

Mokokchung, Rongchii/April 15 (TYO): Mokokchung District Football Association (MDFA) ajanga Mokokchung nung football asaya ajungkettsü aser talisa lanurtem football asaya nung anitettsü mangdang nung "Zonal Association" tentetta aotsü asoshi tanü Whispering Winds Mokokchung nung sentong ka agiogo.

Sentong nung MDFA Executive Wb. Yimya Jamir-i MDFA ajanga Zonal Association mapatong tenzükba indang jembidang Mokokchung district kübok yimtsüng aser jila balala nung football tournament asayabaji MDFA-i meteta akatsüla aser item tournament nung asayar tajungtemji shimtettsü aser MDFA tournament ama nung asayadakja anitetta asayar tajung küma anitettsü nukjidong lir ta ashi.

Yimya Jamir-isa Zonal Association tenteta inyaka aotsüba ya MDFA inyakyim rongnung tongtipangtiba ka lir, Mokokchung district nung block 9 lemsar iba mapatong ya

inyaktsü aser tanü iba ya asangsang nung tenzükur kelen Mongkolemba, Tuli aser kubolong nungi mezüngsüa tenzükur inyaka aotsü nukjidong aliba lemsatop.

Nagaland Legislative Assembly Speaker & Chairman DPDB Mokokchung Wb.Sharingain Longkumer-i MDFA nukjidong Zonal Association sentong tenzüksür mapang tatsüka agia jembidang Zonal Association tenteter Mokokchung nung football asaya ajungtsü asoshi mapatong tajung achayangba ya MDFA-i kanga dang shisa ka-a mangdang tulu nung tenzükogo ta MDFA nem tenüngsang agüja ashi.

Speaker-isa, MDFA nung tejen lenirtemi mapa tajung baika inyaka Mokokchung football asaya asoshi inyakba meteta aruogo saka parnok mapang nung asayaba tesem aser ki-ojen metemsüba ajanga asenoki tangar atongba metongtet, saka tangbo Nagaland sorkari asayaba tesem aser nungtakba ki-o-jen

nung temeling agüja inyakdagi, iba mapang nung asayar tajung anitettsüjibo asenok achayangertem teinyaktsü lir, anungji MDFA-i iba maongkaji agia tapet mera agia asen nübür talisa lanur rongnungi football asayar tajungtem anitettsü nüngdaker ta ashi.

Ungma lushi Rempokong tesem nung Astro Turf ground-ji international standard jenjang nung yangludagi, iba ground nung ya asayartem asayaba dang masü saka iba ya ajanga Mokokchung renloka aotsü asoshi Mokokchung nübürtem shisa kaa alitsüla. Rempokong nung Astro Turf Ground akaba ajanga Mokokchung temaba nung ajungketa aser renloka aotsü yimla-a sarasadema atar, ta NLA Speaker Wb.Sharingain Longkumer-isa lemsatopa liasü.

Sentong tenzuka Tsüngremer lenisüba jazüka MTBA Youth Mentor Alemnungla-i sarasadem aser MDFA President Wb. N. Akok Longkumer-i tarur pela-a agizüka jembia liasü.

Iraq FA-i head coach Jesus Casas mapa nungi anentsüogo

Rongchii/April 15, 2025 (Agencies): Iraq-i Mongolbarnü sangdong ka ajanga head coach Jesus Casas mapa nungi anentsüba metetdaksüogo. 2026 World Cup atema Asian qualification nung asaya ana dang anunga lia pa mapa nungi anentsüogo.

Iraq Football Association-i sangdong ka ajanga ashiba agi, Spain nunger coach aser pa indang assistant temi contract dak sendakba nung aibelenba atema iba telemtetba agiogo, kong official temelaba magi Iraq toktür aoba densema lir.

Federation-isa, Status and Transfers of Players dak sendakba nung FIFA Regulations Article 14 dak ajemdaker iba jenjang ya agiogo, ta metetdaksü. Iba ocet nung telok kati contract ka tatalokba ka lira consequences melei thitsütsü koka lir ta shia lir.

Domestic media sangdong balala ajanga ashiba agi, March ita World Cup qualification nung Group B nung bonglang nung aliba team ana den junga masayatetba sülen Iraq federation-i Casas mapa nungi anentsütsü telemtetba agiogo,

shiba taoba mapang Spain national team indang assistant liasü aser 2022 küm November ita shima liasü.

Kuwait nung kidang Iraq team 2-2 nung asaya tembang aser iba sülen anogo pongu lir Palestine team makokba sülen par telok nung automatic qualification jenjang ana aliba nungi tugatoka liasü.

Team ya tang South Korea aser Jordan na sülen tasembuba nung lir. Parnok team ana den ya June ita asayatsü lir aser iba tetezü Iraq team World Cup atema qualify asütsü asoshi team anaprongla ya akoktsü nüngdaker. Parnok tatamsa 1986 küm World Cup atema qualify süa liasü.

Asian qualification tasembuba round nung telok asemprongla nungi temaba jenjang nung tembangba team ana WC atema qualify asütsü, koba United States, Canada aser Mexico nung asayatsü lir.

Iraq team tasembuba mesüra pezübuba nung tembangra international qualification round kati aitsü kong team trok jenjang ana atema asayatsü.

BILEMDANGANG

"Tetsübu agi pungmang ajak amokseper."